

現代生活藝術系列

華嚴經疏論纂要 26

— 淨行品

華藏淨宗學會印贈

大方廣佛華嚴經疏論纂要卷第二十六

五臺山清涼國師澄觀疏鈔

太原方山長者李通玄論

閩鼓山私淑比丘道霈纂要

淨行品第十一

○釋此一品五門分別初來意

〔疏〕來意者。夫欲階妙位。必資勝行。有解無行。虛費多聞。故前品明解。此品辨行。又前明入理。觀行。今辨隨事所行。又前行此願。並義次第。故次來也。

○次釋名

〔疏〕釋名者。梵云具折囉。此云所行。波利。此云皆也。徧也。成輪。聿提。云清淨也。謂三業隨事緣歷。名爲所行。巧願防非。離過成德。名爲清淨。又悲智雙運。名爲所行。行超凡小。故稱清淨。以二乘無漏。不能兼利。非真淨故。得斯意者。舉足下足。盡文殊心。見聞覺知。皆普賢行。文殊心故。心無濁亂。是曰清淨。普賢行故。是佛往修。諸佛菩薩同所行也。所行卽淨。持業釋也。

○三宗趣

〔疏〕宗趣者。以隨事巧願。防心不散。增長菩薩悲智。

大行為宗。成就普賢實德爲

○四解妨

〔疏〕解妨者。問。文中但辨一百餘願。何有行耶。答。文中辨行。畧有數重。謂就所歷事中。始自出家。終於臥覺。皆是行也。觸境不迷。善達事理。智行也。以願導智。不滯自利。大悲行也。上二不二。悲智無礙行也。遇違順境。心不馳散。止行也。智不沉沒。觀行也。卽止觀雙運行也。又對於事境。善了邪正。當願衆生。皆假觀也。知身空寂。心無染著。空觀也。見如實理。中觀也。或先空後中。或先假後空。或一或二。或

一念頓具。斯爲妙達三諦觀之行也。又所造成行。皆施衆生不起二乘之心。安忍強軟兩境。或增善品。心不異緣。妙達性空。善巧迴轉。皆願利物。同趣菩提。二乘天魔所不能動。善知藥病。決斷無差。卽十度齊修之行也。又皆願利生。皆成佛德。見惡必令其斷。見善必令其具。卽四弘誓願之行也。故智首總標諸德以求其因。文殊令善用心。頓獲衆果。但言惟願。豈不惑哉。復有問言。夫妙行者。統唯無念。今見善見惡。願離願成。疲役身心。豈當爲道答。若斯見者。離念求於無念。尙未得於真無念也。況

念無念之無礙耶。又無念。但是行之一也。豈成一念頓圓如上所明也。行學之者。願善留心。

〔論〕將釋此品。約作四門分別。一釋品名目。二釋品來意。三釋品宗趣。四隨文釋義。一釋品名目者。何故名爲淨行品。以無始諸見無明貪瞋癡愛。今已發菩提心。信樂正法。頓翻諸見。成其大願。長大悲門。若但以三空無相對治。不生大慈大悲。不能成就普賢行故。欲行長路。非足不行。欲行大悲。入普賢門。充法界行者。於一切見聞覺知而無過失。便成萬行莊嚴。皆勤修習此一百四十大願門。便於

生於海中。見聞覺知。一切諸行。悉皆清淨。入普賢
行故。故名淨行。若無此願。設斷煩惱。卽二乘行故。
設是菩薩。卽生淨土。以此一百四十大願門。頓能
淨其一切塵勞。便成普賢法界行故。故名淨行。以
此大願莊嚴一切世間諸行。總爲法界一切道場。
故名淨行。以此諸見。成大善根。故名淨行。二釋品
來意者。爲明前問明品。是成其十信中解故。此品
成其十信之行故。此品須來。乃至果行圓滿已來。
不離此大願故。三釋品宗趣者。以智首是下方頗
黎色世界。佛號梵智。明是一切諸佛法。本自體白。

淨無染之智。以爲能問之人。文殊師利菩薩。卽是
一切諸佛善擇妙慧。爲說法之主。以一切諸佛根
本智慧之問。善自爲問答之主伴。說一百四十大
願之門。以成十信。十住。十行。十迴向。十地。十一地
等。普賢法界無盡行海。又隨位修道。上煩惱。六位
中。一位有二十。六位共有一百二十。根本十無明
皆因身見邊見。二見有二十。共隨位進修。染淨煩
惱。總有一百四十。爲防此障。起一百四十願。令進
修者。從初信心。理事圓融。達其願體。無虧自心根
本。淨智妙擇之慧。動寂俱真。不偏修故。是故華藏

世界有如須彌山微塵數風輪所持。其上一切莊嚴。因大願風輪。能持萬行。以行招果故。因以願力堅持。報得風輪持利故。又云。如是華藏莊嚴。皆從普賢願力起。爲無願故。行乃不成。卽莊嚴不現。不感無盡依果報故。由是義故。信心之上。法性悲智。妙慧萬行。總依佛有。而爲進修。不得別有。若離佛別有自法者。不成信心。不成十種勝解。不成修行。設苦行精勤。是邪精進。勤苦累劫。生人天中。一念貪瞋。一時焚盡。是故此品下文云。住去來今諸佛之道。隨衆生住。恒不捨離。如諸法相。悉能通達。斷

一切惡具足衆善。當如普賢色像第一。一切行願皆得具足。已上明宗趣竟。意明廻凡小所執心境差別業。皆成願海。具普賢門。四隨文釋義。如文自具。

○第五釋文中二。先智首問。舉德徵因。後文殊答。標德顯因。今初。亦先標問答之人。後陳所疑之問。今初。

爾時智首菩薩問文殊師利菩薩言

〔疏〕此二菩薩爲顯圓修。歷事巧願。必智爲導。故事近旨遠。唯圓行故。文殊則般若觀空。智首則漚和。

涉事。涉事不迷於理。故雖願而無取。觀空不遺於
事。故雖空而不證。是為權實雙游。假茲問答。鈔。漚和涉
事者。梵語其舍羅。此云方便善巧。即肇公宗本論
文論云。漚和般若者。大慧之稱也。諸法實相。謂之
般若。能不形證。漚和功也。適化衆生。謂之漚和。不
染塵累。般若力也。然則般若之門。觀空漚和之門。
涉有。涉有未始迷虛。故常處有而不染。不厭有而
觀空。故觀空而不證。是為一念之力。權慧具矣。一
念之力。權慧具矣。
好思。歷然可解。

○二陳所問中。有二十二云何。總十一段。段各十句
成一百一十種德。第一段。明三業離過成德。二
得堪傳法器。三成就衆慧。四具道因緣。五於法
善巧。六修涅槃因。七滿菩薩行。八得十力智。九

十王敬護。十能爲饒益。十一超勝尊貴。此十一中。若就相顯。二四與六。此三唯因。八及十一。此二唯果。餘通因果。或攝爲四對因果。初二十句。問福因福果。先因後果。次二十句。問慧因慧果。先果後因。三二十句。問巧解因觀行果。四有五段。問修行因成德果。初一爲因。餘四爲果。或分爲二。初二云何。問淨行體。是問因義。後十二云何。問行所成。是問果義。以善修七覺等。亦是淨行之能故。皆言云何得者。爲修何行而得之耶。初十望後。故說爲因。望歷緣巧願。成淨行體。卽是

於果。未是圓果。而是分果。故上總云。舉果徵因。
今分爲二。初之一段。總問其果。後十別明。今初

十句

佛子。菩薩云何得無過失身語意業。云何得不害身
語意業。云何得不可毀身語意業。云何得不可壞身
語意業。云何得不退轉身語意業。云何得不可動身
語意業。云何得殊勝身語意業。云何得清淨身語意
業。云何得無染身語意業。云何得智爲先導身語意
業。

〔疏〕得此十種三業。成下十果。由無過三業。故超勝

尊貴。由不恚害。故常爲饒益。由無餘惑。不可譏毀。
故十王敬護。由惡緣不可壞。得佛十力。由修行不
退轉。滿菩薩行。由遠離諸相。如如不動。成涅槃因。
由德行殊勝。故於法善巧。由體清淨如虛空。故成
具道緣。由涉境無染。故得堪傳法器。由智先導。故
成就衆慧。又由後十。能成就此十。以十三業永無
失等。唯佛不共。分分無失。亦通於因。又此十句。初
一總顯無過。次八別顯無過。後一總出其因。若以
智慧爲先導。身語意業常無失故。又於中八前二
離過後六成德。鈔又由後十下。二先果後因。釋以
初十句爲果。後之十段百句爲因。

故云永無失等。唯佛不共。永無失等者。等下九句。不害業等。言不共者。卽十八不共法。今約分分。故爲後

因 ○後十段別明中。初一異熟果。次四士用果。次二

離繫果。次一增上果。後二等流果。今初卽修道

之器。以菩薩起修行時。要具此十方成二利之

行。鈔初一異熟果者。俱舍顯相頌云。異熟無記

因彼力生。是果名士用。除前有爲法。有爲增上

果。釋曰。初二句。異熟果相。但是無覆無記。不通

非情。從善惡感。各有記生。次句。等流果相。似於

同類。徧行自因。次句。離繫果相。由慧盡者。慧卽

擇也。盡卽滅也。謂此擇滅。離繫所顯。故將擇滅

釋離繫果。次二句。士用果相。若法因彼勢力所

生。如因下地加行心力。上地有漏無漏定生。及

因清淨靜慮心力。生得變化無記心等。離繫名

爲不生土用。爲因道力證得。亦得土用果名。後二句增上果相。有爲法生。餘法不障。是增上果。故唯有爲除前已生有爲之法。謂果望因。或俱或後。必無前果後因。故云除也。除此前外。餘諸有爲。謂之增上果。論云。增上之果。問土用增上二果。何殊。答。土用果名。唯對作者。增上果稱通對所餘。如匠所成。對能成匠。俱得土用。增上果名。對餘非匠。唯增上果。非匠不造。故非土用。瑜伽三十八云。習不善故。樂住不善等。爲等流果。或似先業。後果隨轉。釋曰。此有二義。釋於等流。後義果似於因。卽俱舍意。如殺生因等。得短壽果。前義卽於後果之上。行因似因。如前世殺生。今亦好殺等。瑜伽又云。以道滅惑。各離繫果。四人工等事。由此成辦稼穡財利等果。爲土用果。若眼識等。是眼根等。增上果。身分不壞。是命根。增上果。二十二根。各起自增上果。當知一切名。增上果。餘例可知。然上所引俱舍。卽是根品。彼論以六種因成斯五果。非今所要。

云何得生處具足。種族具足。家具足。色具足。相具足。

念具足。慧具足。行具足。無畏具足。覺悟具足。

〔疏〕十事。瑜伽具釋。一常生中國有佛法處。二種族尊貴。非下賤等。三生信向三寶修善之家。非外道等家。四形色端嚴。非醜陋等。五具丈夫相。諸根不缺。六正念不忘。亦宿念現前。七慧悟高明。善解世法。八柔和調善。離過修行。九志力堅強。故無怯弱。十性自開覺。不染世法。又無畏者。依智度論。菩薩有四種無畏。一總持無畏。於法記持。不懼忘失。二知根無畏。知根授法。不懼差失。三決疑無畏。隨問能答。不懼不堪。四答難無畏。有難皆通。不懼疑滯。

今竝皆得。故云具足。又此十事。若約法者。生在佛家。是生處具足等。思之。又具足者。唯佛一人。云云。
鈔又此十事下。約法生在佛家者。菩提心家故。等於餘句。謂二種族。卽具佛種性。謂自性任性。習所成等。三明家。卽真如爲家。亦四家故。四家如七地。四明見佛性。如見色故。涅槃云。佛性有二。一色。二非色。如來所見。爲色故。五相。謂有悲智等。爲菩薩相。故餘之五句。經自約法可知。又具足下。重釋具足之言。上約橫具爲具足。今約豎說之。

○第二有四段明士用果

云何得勝慧。第一慧。最上慧。最勝慧。無量慧。無數慧。不思議慧。無與等慧。不可量慧。不可說慧。

疏四段者。一慧爲揀擇。二力。謂修習。三善巧。謂智。

四道品助修。悉以三業而得成就。今初言慧者。卽道之體。十中一勝世間故。二過二乘故。三棟權教故。四佛果超因故。上四棟劣。餘六當體。一無分量。二無若干。三超言念。四無等匹。五難比校。六唯證相應。欲言其有。無相無形。欲言其無。聖以之靈。欲言俱者。慧無二體。欲言雙非。非無詮顯。故不可說。云何得因力。欲力。方便力。緣力。所緣力。根力。觀察力。奢摩他力。毗鉢舍那力。思惟力。

〔疏〕第三力者。卽具道因緣。皆言力者。此十各有資道之能故。一因力者。卽是種性。謂已有習種。無倒

聞熏與性種合。故名爲因。梁攝論云多聞熏習。與阿賴耶識中解性和合。一切聖人以此爲因。無性攝論云此聞熏習。雖是有漏。而是出世心種子性。鈔卽是種性者。謂種性位。由於習種。合於性種。方名種性也。性種卽自性住性。爲正因性。卽是涅槃第一義空性也。習卽新熏修成之。性決爲佛因。稱爲種性。引證可知。二欲力者。有勝欲樂。希大菩提。及起行故。三方便者。謂造修力。依六方便。成悲智故。一慈悲願戀。二了知諸行。三欣佛妙智。四不捨生歿。五輪迴不染。六熾然精進。攝論廣說。四緣力。謂善友勸發。五所緣力。卽所觀察悲智之境。六根。謂信等。七觀察者。謂於自他事理。

藥病善揀擇故。八奢摩他。此云止。九毘鉢舍那。此云觀也。瑜伽起信等論。深密涅槃等經。廣辨其相。具如別章。今畧顯其相。以爲十門。一心行稱理攝散名止。二止不滯寂不礙觀事。三由理事交徹而必俱遂。使止觀無礙而雙運。四理事形奪而俱盡。故止觀兩亡而絕寄。五絕理事無礙之境。與泯止觀無礙之心。二而不二。故不礙心境而一味。不二而二。故不壞一味而心境兩殊。六由卽理之事。收一切法。故卽止之觀。亦見一切。七由此事卽是彼事。故令止觀見此心卽是彼心。八由前中。六則一

多相入而非一。七則一多相是而非異。此二不二
同一法界止觀無二之智。頓見卽入二門。同一法
界而無散動。九由事則重重無盡。止觀亦皆眼齊
照。十卽此菩提門之智爲主。故頓照菩提門法界時。必
攝一切爲伴。無盡無盡。是此華嚴所求止觀。十思
惟者。籌量應作不應作故。

云何得蘊善巧。界善巧。處善巧。緣起善巧。欲界善巧。
色界善巧。無色界善巧。過去善巧。未來善巧。現在善
巧。

〔疏〕第四於法善巧。皆約流轉以明。前四流轉之體。

三界流轉之處。三世流轉之時。三科之義。畧如前釋。廣如別章。緣起。六地廣明。三界三世。如前後釋。皆言善巧者。一善知彼法。空無所有。二善知不壞

假名。分別法相。三加能攝無盡。彌善巧也。

鈔皆約流轉者

由善巧義。通還滅故。總釋善巧。乃有三義。一知理。二知事。三加能攝無盡。正是事事無礙。兼於事理無礙。故大品云。一切法趣色。色尚不可得。云何當得有趣非趣。一切同歸於空。諸法之空。不異色空。故。卽事理無礙意。今取一攝一切。卽事事無礙善巧。開此爲二。便有四義。瑜伽五十六七。廣說三科善巧多約相說。卽第二義。

云何善修習念覺分。擇法覺分。精進覺分。喜覺分。猗覺分。定覺分。捨覺分。空。無相無願。

〔疏〕第五修涅槃因。七覺三空十地品廣說

○第六七二段明離繫果

云何得圓滿檀波羅蜜尸波羅蜜羸提波羅蜜毗黎
耶波羅蜜禪那波羅蜜般若波羅蜜及以圓滿慈悲
喜捨

〔疏〕第六滿菩薩行。初六度四等。修卽十用。滿卽離
繫。治諸蔽故

云何得處非處智力。過未現在業報智力。根勝劣智
力。種種界智力。種種解智力。一切至處道智力。禪解
脫三昧染淨智力。宿住念智力。無障礙天眼智力。斷

諸習智力。

〔疏〕第七具足十力。並見上文。

○第八段明增上果。

云何常得天王。龍王。夜叉王。乾闥婆王。阿脩羅王。迦樓羅王。緊那羅王。摩睺羅伽王。人王。梵王之所守護。恭敬供養。

〔疏〕第八十王敬護。是增上果者。卽有力增上。由已具德。令彼護故。

○第九十二段明等流果。

云何得與一切衆生爲依。爲救。爲歸。爲趣。爲炬。爲明。

爲照。爲道。爲勝導。爲普導。

〔疏〕二段明等流果者。由本願力。爲依救等。由本行力。爲第一等。今初能爲饒益。依等十句。如廻向初。云何於一切衆生中爲第一。爲大。爲勝。爲最勝。爲妙。爲極妙。爲上。爲無上。爲無等。爲無等等。

〔疏〕第十超勝尊貴。十地論釋。今就佛果畧釋其相。謂如來功德海滿。更無所少。故稱第一。此亦總句。大者。體包法界故。勝者。自利圓滿故。最勝者。利他究竟故。妙者。煩惱障盡故。極妙者。所知障盡故。上者。望下無及故。無上者。望上更無故。無等者。望下

無倚故。無等等者。望倚皆是無等者故。所以廣舉諸德者。欲顯行之勝故。上來問竟。

○第二文殊答。文分爲二。第一歎問成益。

爾時文殊師利菩薩。告智首菩薩言。善哉佛子。汝今爲欲多所饒益。多所安隱。哀愍世間。利樂天人。問如是義。

〔疏〕言饒益者。利益也。言安隱者。安樂也。言利樂者。卽上二也。

○第二正酬其問。於中二。先標因成德。酬其舉德。後指事顯因。酬其徵因。今初。

佛子若諸菩薩善用其心。則獲一切勝妙功德。於諸佛法心無所礙。住去來今諸佛之道。隨衆生住。恒不捨離。如諸法相。悉能通達。斷一切惡。具足衆善。當如普賢色像第一。一切行願皆得具足。於一切法無不自在。而爲衆生第二導師。

疏初先標其因。謂善用其心。心者。神明之奧。心正則萬德攸歸。言善用者。卽後歷緣巧願。觸境入玄。如上所辨。二則獲下。顯所成德。初總。後別。總謂一切勝妙功德。皆因用心。一百四十門德。何足難就。可謂一言蔽諸。勝謂獨尊。妙謂離相。又德無不備。

二云勝。障無不盡名妙。此之總句。亦卽酬上十種三業之總句也。於諸佛下九句。別顯。句雖有九。義亦有十。如次酬上十段之德。一於諸佛法心無所礙者。卽初第一堪傳法器德。念慧覺悟皆具足故。二任去來今諸佛之道。卽上成就衆慧。三世諸佛。唯以佛慧爲所乘故。三隨衆生任恒不捨離。卽上具道因緣。成就種性欲樂方便。常以衆生爲所緣故。四如諸法相悉能通達。卽十善巧義無惑也。五斷一切惡。卽七覺二空。揀擇棄惡。無越此故。六具足衆善。卽六度四等。七當如普賢色像第一。由此故。

得十王敬護。八一切行願皆得具足。卽是前文成就十力。得佛果位。方具足故。故晉經無此一句。而有成就如來一切種智。斯爲十種智力。定無惑也。唯此一段望前不次。以內具種智。外具色相。此二同在果圓。前後無在。或譯者不迴。九於一切法無不自在。故能與物爲依。爲救。爲炬。爲明。十而爲衆生第二導師。卽是上文於衆超勝。上求第一。唯佛一人。今纔發心。則道亞至尊。故云第二。然舊經中亦云而爲衆生第一尊導。故知第二譯者意也。

○第二指事顯因。於中三。初總徵。次別顯。後總結。

成益今初

佛子。云何用心。能獲一切勝妙功德。

○二別顯中。五門分別。一總明大意。文中總有一百四十一願。菩薩大願深廣如海。應如迴向。非止爾也。此蓋示於體式。餘皆倣此。又非無表。一百者。十信圓融。一一具十也。四十一者。卽四十一位也。明此諸位所有惑障。由此能淨。所有勝行。由此能行。故。鈔卽四十一位者。此約行修有障等。四十二。卽妙覺位。是所求故。無障非行故。○二通顯文旨。然此諸願。句雖有四。事但有三。義開爲六。言二事者。謂初句願所依事。

次句願所爲境。後二句是願境成益開爲六者。初事有二。一者內。謂菩薩自身根識等。經云。菩薩等故。二者外。謂他身。或依正資具等。經云。在家等故。次事亦二種。一能發願者。二所願衆生。經云。當願衆生故。後事亦二。一者自益。由此諸願成。前諸德故。二者益他。由此發願。願衆生故。此後二句。或前句是因。後句是果。如云。所行無逆。成一切智等。或二俱是因。如云。巧事師長。習行善法等。或二俱是佛果。如云。永離煩惱。究竟寂滅等。或俱通因果。如云。以法自娛。了妓非實等。

或三四二句共成一句。如云演說種種無乖諍法。等。亦可後二句中。初句所入法。如云知家性空等。後句所成益免逼迫等。以不必具。故合爲一。○三別開義類。然上三事中。願所依事。雖有多類。不出善惡依正內外。隨義準之。二願所爲境。其一願。盡該法界一切有情。不同權小。談有藏無故。又願卽行。成迴向故。一一皆成所行清淨善業行故。如云知家性空。則菩薩之心。必詣空矣。三願所爲境成利益中。由願於他成種種德。自獲如前所說功德。然有二義。一通。二別。

通則隨一一願。成上諸德。斯爲正意。二別顯者。如願於他得堅固身。心無所屈。則自必成十種三業。離過成德之德也。三願於他具足成滿一切善法。則自成。就堪傳法器。四願於他深入經藏智慧如海。則自成。就具道因緣。五願於他語業得最勝法。則自成。就十善巧德。六願於他滿足巧能演說。則自成。就七覺三空。七願於他得善意欲洗除惑垢。則自成。滿菩薩行德。八願於他皆辦具諸佛法。則自成。滿菩薩行德。八願於他捨衆聚法。成一切智。則自成。就如來十

種智力。九願於他。皆如普賢。端正嚴好。則自成
就十王敬護。十願於他。統理大眾。一切無礙。則
自成饒益。為依救德。十一願他得第一位。入不
動法。則自成就超勝第一德。以斯十一。配上答
中總別十一段文。竝可知。通別交絡。應成四句。
謂一切願成一德。一切願成一切德等。以因願
一多相卽。故成德亦一多鎔融。不同權小等者。一
人有大覺性。權卽五性。談其有者。藏其無者在
有佛性中故。又云。通別類異。通卽皆有。別則有
有佛性。存無佛性。○四對辨成例。謂若以初後二事相
對辨例。畧有十例。一會事同理例。如菩薩在家。

事也。性空理也。二處染翻染例。如若得五欲染也。拔除欲箭。翻染也。三相似類同例。如若有施令一切能捨等。四世同出世例。如上升樓閣。願升正法樓等。五以因同果例。如正出家時。願同佛出家等。六捨僞歸真例。如著瓔珞。願到真實處等。七以人同法例。如見病人。願離乖諍等。八以境成行例。如見湧泉。願善根無盡等。九以妄歸真例。如見婆羅門。願離惡等。十以近同遠例。如受和尚教。願到無依處等。○五正釋經文。長分爲十。初有十一願。明在家時願。二有十五願。

出家受戒時願。三有七願。就坐禪觀時願。四有六願。明將行披挂時願。五有七願。澡漱盥洗時願。六有五十五願。明乞食道行時願。七有二十二願。明到城乞食時願。八有五願。明還歸洗浴時願。九有十願。明習誦旋禮時願。十有三願。明寤寐安息時願。今初在家有十一願。

佛子

菩薩在家	當願衆生	知家性空	免其逼迫
孝事父母	當願衆生	善事於佛	護養一切
妻子集會	當願衆生	寃親平等	永離貪著

若得五欲	當願衆生	拔除欲箭	究竟安隱
妓樂聚會	當願衆生	以法自娛	了妓非實
若在宮室	當願衆生	入於聖地	永除穢欲
著瓔珞時	當願衆生	捨諸偽飾	到真實處
上昇樓閣	當願衆生	昇正法樓	徹見一切
若有所施	當願衆生	一切能捨	心無愛著
衆會聚集	當願衆生	捨衆聚法	成一切智
若在厄難	當願衆生	隨意自在	所行無礙

〔疏〕初一總舉在家。以家是貪愛繫縛所故。若了性空。則雖處居家。家不能迫。次一在家行孝願。以是

至德行本。故首而明之。大集經云。世若無佛。善事
 父母。事父母者。卽是事佛。父母於我爲先覺故。今
 翻令事佛者。生長法身故。護養一切者。一切衆生
 皆我子。故護之。一切男女皆我父母。故養之。生生
 無不從之受身。故平等敬之。法身佛故。鈔以是至
 德等者卽
外典意。故孝經夫子語曾子曰。先王有至德要道。
 民用和睦。上下無怨。汝知之乎。注云。至德者。孝悌
 也。要道者。禮樂也。故上至天子。下至庶人。皆當行
 孝。無始終也。言行本者。俗典以孝爲百行之本。下
 引佛教證。菩薩戒亦云。孝養師
 僧父母。孝名爲戒。亦名制止。 次四受家室等願。
 然五欲射心。猶如箭中。王侯有宮。餘皆名室。次五
 在家所作事業等願。在頸曰瓔。在身曰珞。珞以持

衣瓔以繫冠。一切悉捨。亦捨心也。了聚無性成佛智也。

○第二出家受戒時。有十五願

捨居家時 當願衆生 出家無礙 心得解脫

入僧伽藍 當願衆生 演說種種 無乖諍法

詣大小師 當願衆生 巧事師長 習行善法

求請出家 當願衆生 得不退法 心無障礙

脫去俗服 當願衆生 勤修善根 捨諸罪軛

剃除鬚髮 當願衆生 永離煩惱 究竟寂滅

著袈裟衣 當願衆生 心無所染 具大仙道

正出家時	當願衆生	同佛出家	救護一切
自歸於佛	當願衆生	紹隆佛種	發無上意
自歸於法	當願衆生	深入經藏	智慧如海
自歸於僧	當願衆生	統理大衆	一切無礙
受學戒時	當願衆生	善學於戒	不作衆惡
受闍梨教	當願衆生	具足威儀	所行真實
受和尚教	當願衆生	入無生智	到無依處
受具足戒	當願衆生	具諸方便	得最勝法

〔疏〕初一正捨俗家。次三出家方便。僧伽藍者。此云衆園。衆有六和法。則事理一味。故無諍也。大師謂

佛衆所宗故。小調和尚。親所教故。若約末世。三師
爲大。七證爲小。靡不有初。鮮克有終。故希不退。次
四正落髮出家。袈裟者。不正色衣也。亦云染色。表
心染於法。要無所染。方曰染也。然二乘之染。亦非
真染。必心染大乘。故云具大仙道爲於正法除其
結使。方爲究竟寂滅。落髮披衣之後。爲正出家。然鈔
二乘等者。卽涅槃第二。南經哀歎品。佛訶三修比
丘云。汝諸比丘。勿以下心而生。知足。汝等今者。雖
得出家。於此大乘。不生貪慕。汝諸比丘。身雖得服
袈裟。染衣心。猶未染大乘淨法。汝諸比丘。雖行乞
食。經歷多處。初未曾求大乘法。食。汝諸比丘。雖除
鬚髮。未爲正法。除諸結使。汝諸比丘。今當眞實教
勅汝等。我今現在大衆和合。如來法性。眞實不倒。
是故汝等。應當精進攝心。勇猛摧諸結使。釋曰。此

以小乘方大尚未能除所知無明。餘七受學戒時。染法空法常任妙法。故云爾也。初三自歸佛在之日。則五受之一。佛滅之後。受五八戒。必依三歸。歸要三者。翻彼外道邪師。邪教及邪衆故。猶如良醫。良藥。及看病人。煩惱病愈故。爲與衆生爲緣念故。三寶之義。至下當釋。受學戒者。卽十戒也。亦通五戒。優婆塞戒經云。欲受菩薩戒。先應徧受五戒。十戒。二百五十戒。若尼則六事。及五百戒。受。謂受戒學。卽隨戒願中。卽止作二持。闍黎者。此云正行。軌範教授。故云具足威儀。和尚。此云親教。亦云力生。道力自彼生故。故翻云。八無生。

智。依之得戒。故翻無依。具足戒言。義合二種。一則大比丘戒。二則菩薩戒。亦制意地方為具足。受之則五一者。一善來。二上法。三三歸。四入敬。五羯磨。多釋不同。多依此五歸要三者。前歸敬序中。已廣說竟。言至下當釋者。即明法品。前是鈔廣。故此指下。和尚等者。此是昔時梵語。即龜茲。已來梵言。正云。即波陀耶。此云親教。具足戒等者。依比丘戒。則五八十。皆為方便。五眾之最。為最勝法。若菩薩戒為具足。則比丘戒亦為方便。超三乘上。為最勝法。願所成者。明是佛果。

○第三七願。明就坐禪觀時願

若入堂宇

當願眾生

昇無上堂

安住不動

若敷牀座

當願眾生

開敷善法

見真實相

正身端坐

當願眾生

坐菩提座

心無所著

結跏趺坐 當願眾生 善根堅固 得不動地

修行於定 當願眾生 以定伏心 究竟無餘

若修於觀 當願眾生 見如實理 永無乖諍

捨跏趺坐 當願眾生 觀諸行法 悉歸散滅

〔疏〕初四爲修方便。次二正修止觀。後一修行事訖。

○第四明將行披挂時六願

下足住時 當願眾生 心得解脫 安住不動

若舉於足 當願眾生 出生死海 具衆善法

著下裙時 當願眾生 服諸善根 具足慙愧

整衣束帶 當願眾生 檢束善根 不令散失

若著上衣 當願眾生 獲勝善根 至法彼岸
 著僧伽梨 當願眾生 入第一位 得不動法
 〔疏〕下衣蓋醜。故願得慚愧。上衣。卽衫襖之輩。前已
 辨袈裟。故此直云僧伽梨。僧伽梨者。義云和合。新
 者二重。故者四重要以重成。故云和合。卽是二衣
 中第一衣故

○第五澡漱盥洗時有七願

手執楊枝	當願眾生	皆得妙法	究竟清淨
嚼楊枝時	當願眾生	其心調淨	噬諸煩惱
大小便時	當願眾生	棄貪瞋癡	蠲除罪法

事訖就水

當願衆生

出世法中

速疾而往

洗滌形穢

當願衆生

清淨調柔

畢竟無垢

以水盥掌

當願衆生

得清淨手

受持佛法

以水洗面

當願衆生

得淨法門

永無垢染

〔疏〕楊枝五利。是日妙法。去穢為淨。西域皆朝中嚼

楊枝。淨穢不相雜。此為常規。凡欲習誦。別須用之。

盥者。澡也。〔鈔〕楊枝五利者。一明目。二除痰。三除口

穢。氣四辨味。五消食。新經有十義。朝中嚼

楊枝。淨穢不相雜。此兩句語。全是無行禪師

於西域寄歸之書。南海寄歸傳亦廣說之。

○第六乞食道行時。總有五十五願

手執錫杖

當願衆生

設大施會 示如實道

見路無塵	見路多塵	若見直路	見斜曲路	見趣下路	見昇高路	涉路而去	若在於道	發趾向道	執持應器
當願衆生	當願衆生	當願衆生	當願衆生	當願衆生	當願衆生	當願衆生	當願衆生	當願衆生	當願衆生
常行大悲	遠離塵仝	其心正直	捨不正道	其心謙下	永出三界	履淨法界	能行佛道	趣佛所行	成就法器
其心潤澤	獲清淨法	無諂無誑	永除惡見	長佛善根	心無怯弱	心無障礙	向無餘法	入無依處	受天人供

若見險道 當願衆生 住正法界 離諸罪難

〔疏〕更分爲三。初十二願。游涉道路。次見衆會。下十九願。所覩事境。後見嚴飾。下二十四願。所遇人物。今初錫者。輕也。明也。執此杖者。輕煩惱故。明佛法故。更有多義。具如經辨。今畧明二用。一執爲行道之儀。二振以乞食。故發相似之願。無依之道。是真道也。向無餘法。真涅槃也。真淨法界。心所履也。險道有二。一多賊鬼毒獸。二阨徑阻絕。初惑業罪苦。凡夫之險道也。後自調滯寂。二乘之險道也。皆爲難處。不斷生歿而入涅槃。正法界也。 初十二願

游涉道路竟

若見衆會 當願衆生 說甚深法 一切和合

疏二觀事境願初觀衆會。謂衆聚多談無義。故願

說深法。衆心易乖。故令和合

若見大柱 當願衆生 離我諍心 無有忿恨

疏二大柱者。舊經云大樹。梵云薩擔婆。去聲。此云

樹也。薩擔婆。入聲。此云柱也。由茲二物呼聲相濫。

古今譯殊。柱有荷重之能。一舍由之而立。翻此願

離我能之諍。忿恨何由而生

若見叢林 當願衆生 諸天及人 所應敬禮

疏三德猶叢林。森聳可敬。

若見高山 當願眾生 善根超出 無能至頂

見棘刺樹 當願眾生 疾得翦除 三毒之刺

見樹葉茂 當願眾生 以定解脫 而為蔭映

若見華開 當願眾生 神通等法 如華開敷

若見樹華 當願眾生 衆相如華 具三十二

若見果實 當願眾生 獲最勝法 證菩提道

若見大河 當願眾生 得預法流 入佛智海

若見陂澤 當願眾生 疾悟諸佛 一味之法

疏十一陂澤者。畜水曰陂。不集諸流。故願一味。

若見池沼 當願衆生 語業滿足 巧能演說

〔疏〕十二說文曰。穿地通水曰池沼。卽池也。取其盈滿。引法流故。亦可巧思穿鑿。能有說故。

若見汲井 當願衆生 具足辯才 演一切法

〔疏〕十三汲者。取也。辨才演法。猶綆汲水。

若見涌泉 當願衆生 方便增長 善根無盡

若見橋道 當願衆生 廣度一切 猶如橋梁

若見流水 當願衆生 得善意欲 洗除惑垢

見修園圃 當願衆生 五欲園中 耘除愛草

見無憂林 當願衆生 永離貪愛 不生憂怖

若見園苑 當願眾生 勤修諸行 趣佛菩提

〔疏〕無憂林者。處之忘憂故 十九願所觀事境竟

見嚴飾人 當願眾生 三十二相 以為嚴好

〔疏〕三見嚴飾下。二十四願所遇人物

見無嚴飾 當願眾生 捨諸飾好 具頭陀行

見樂著人 當願眾生 以法自娛 歡愛不捨

見無樂著 當願眾生 有為事中 心無所樂

見歡樂人 當願眾生 常得安樂 樂供養佛

見苦惱人 當願眾生 獲根本智 滅除眾苦

〔疏〕六云獲根本智滅眾苦者。若得見道無分別根

本智。則斷惡道業無明故。三塗若滅。則三苦八苦亦皆隨滅。及取蘊。直至金剛後根本智。則能永斷。鈔三苦八苦等者。由三塗苦滅。故生老病苦亦滅。由斷此惑。不造十惡業。故無怨憎會苦。由斷分別欲貪。故無求不得苦。及愛別離苦。從此唯有歿及取蘊。至金剛無間道根本智。斷彼二苦。雖有漏善法。此時猶在。行苦所隨。由彼勝智。照同法性於解脫道。不待擇滅。任運棄捨。功歸無間。上約法相說。取正體無分別智。各為根本。以望加行得名。雖通諸位。而見道金剛。二處最顯。故畧舉之。又有約法性。以本覺為根本智。以與始覺為根本故。此唯約解脫道證理時。與根本冥合。乃名獲得本覺根本。從此永無歿及取蘊。雖斷惑證理。立二道名。然同一利那。獲智亦爾。是故無無間道。斷見修二障種時。即是解脫道時。斷也。

見無病人

當願眾生

入真實慧

永無病惱

〔疏〕七願入真實慧。永無病惱者。此有二種。一約入
真見道之慧。斷身病之苦惱。及煩惱病。謂一切惡
趣諸煩惱品。所有麤重。是分別起。亦為身病遠因。
至歡喜地。真見道中。一刹那斷。頓證三界四諦真
如。身病及惑。永不復有。二約金剛心慧。頓斷一切
諸煩惱病。及習氣。隨眠。證極圓滿真實勝義。諸惑
永亡。依上解者。真實慧者。即根本智。但約所滅惑
苦不同耳。鈔一約入真見道者。亦有二義。例同斷
苦。斷身病之苦。牒前所斷。及煩惱病。是
此所斷。謂一切下。出所斷體。麤重。即是種子。分別
揀於俱生。亦為身病遠因者。非近因故。如房色過
度。是身病近因。由貪故爾。即為遠因。一刹那斷者。
至初地中廣釋。頓證三界四諦真如。至十迴向中

釋。二約金剛心等者。卽俱生也。此
上所轉捨。依上解下。結成前二也。

見疾病人 當願衆生 知身空寂 離乖諍法

〔疏〕八四大乖。違成病。知空。則永無所乖。

見端正人 當願衆生 於佛菩薩 常生淨信

見醜陋人 當願衆生 於不善事 不生樂著

見報恩人 當願衆生 於佛菩薩 能知恩德

見背恩人 當願衆生 於有惡人 不加其報

〔疏〕於佛菩薩能知恩德者。諸佛菩薩始自發心。普

緣衆生。難行苦行。不顧自身。垂形六道。隨逐衆生。

見其造惡。如割支體。迄成正覺。隱其勝德。以貧所

樂法誘攝拯救。見其憍恣。示迹涅槃。留餘福教。以濟危苦。故自頂至足。從生至死。皆佛之蔭。斯之恩德。何可報耶。得人小恩。常懷大報。不知恩者。多遭橫死。故經云。假使頂戴經塵劫。身為牀座徧三千。若不傳法利衆生。畢竟無能報恩者。故為自利利人。如說修行。為報佛恩耳。三。初列十恩。一發心。二被恩。三難行。四苦行。五猶如慈母。六嚙苦吐甘。七捨頭目髓腦。八國城妻子。九剗身。十燈。十一投形。十二餓虎。十三香城。十四粉骨。十五嶺亡軀。如是等事。皆為衆生。三不顧自身者。一向為他。四曾無一念。自為於已。猶如慈母。但令子樂。自殺不辭。經云。菩薩所修功德。行不為自己。及他人。但以最上智慧。心利益衆生。故廻向。四垂形六道。恩謂已證滅道。應受無為寂滅之樂。而垂形六道。徧入三塗。長劫救物。入於地獄。以身救贖一切。

衆生五隨逐衆生恩。上辨橫徧六道。今約長劫不捨。如子見父。視父而已。無出離心。如來隨之。如犢逐母。備將萬行。隨逐救攝。如須彌音徧淨天王。得隨諸衆生。永流轉生。或海解脫門。六見其造惡。如割支體。卽大悲深重恩。故善財童子。謂無憂德神云。聖者。譬如有人。唯有一子。愛念情至。忽見被人割截支體。其心痛切。不能自安。菩薩摩訶薩。亦復如是。見諸衆生。造煩惱業。墮三惡趣。受種種苦。心大憂惱。若見衆生。起身語意。三種善業。生人天趣。受身心樂。菩薩爾時。生大歡喜。今畧舉悲深喜。亦深故。七迄成正覺。隱其勝德者。卽隱勝彰劣恩。十蓮華藏塵數相。海滴難稱無盡之德。竝隱不彰。但云百劫修成。十二相。二十四心。斷見修惑。五分法身。覺樹初圓。如老比丘。同五羅漢。故法華中脫珍御服。著弊垢衣。執除糞器。往到子所。八以貧所樂法。誘攝拯救。卽隱實施權恩。圓頓一乘。隱而不說。乃以三乘人。天小法。教化衆生。此上二句。卽淨名經第三香積品中。彼諸菩薩。問維摩詰。今世尊釋迦牟尼。以何說法。維摩詰言。此土衆生。剛強難化。故佛爲說。剛強之語。以調伏之。言是地獄。是畜

生是餓鬼。是諸難處。是愚人。行是身邪。行是身邪。行報等。乃云。如是。剛強難化。衆生。故以一切苦切之言。乃可入律。彼諸菩薩。聞說是已。皆曰。未曾有也。如世尊釋迦牟尼佛。隱其無量自在之力。乃以貧所樂法。度脫衆生。斯諸菩薩。亦能勞謙。以無量大悲。生是佛土。九見其憍恣。示跡涅槃者。示滅生善根。故法華經云。若佛久住於世。薄福之人。不種善根。貧窮下賤。貪著五欲。人於憶想妄見網中。若見如來。常住不滅。便起憍恣。而懷厭怠。不能生難遭之想。恭敬之心。是故如來。以方便說。比丘當知。諸佛出世。難可值遇。乃至云。斯衆生等。聞如是語。必當生於難遭之想。心懷戀慕。渴仰於佛。便種善根。四十七經。有涅槃佛事。與此大同。十留餘福。教以濟危苦者。卽悲念無盡恩。謂世尊同人中。壽應壽百年。留二十年福。以庇末法弟子。大集月藏分第十卷云。悲愍衆生。故捨壽第三分。令我法海滿。洗浴諸天人。假使毀禁戒。悉住不退地。若有過打彼。卽爲打我身。若有罵辱者。則爲毀辱我。又云。留白毫之福。以覆弟子。言留教者。卽三藏八藏。廣益衆生。依之修行。皆得成佛。形像塔廟。乃至舍利。

興供養千返生天等。故自頂至足下。結成恩重得人下。引經證成。共引三經。初卽涅槃第二十八。二不知恩者。卽此經四十八。隨好品。故經云下。三引他經。先一偈。具足經文。唯自利下。取意引彼。亦一偈云。唯有傳持正法藏。宣揚教理。施羣生。修習一念契真。如卽是真報。如來者。會意可知。

若見沙門 當願衆生 調柔寂靜 畢竟第一

〔疏〕沙門。此云止息。畢竟止息。唯大涅槃

見婆羅門 當願衆生 永持梵行 離一切惡

見苦行人 當願衆生 依於苦行 至究竟處

見操行人 當願衆生 堅持志行 不捨佛道

見著甲冑 當願衆生 常服善鎧 趣無師法

〔疏〕世之甲冑。隨於師旅。進忍甲冑。趣於無師

見無鎧仗 當願衆生 永離一切 不善之業

見論議人 當願衆生 於諸異論 悉能摧伏

見正命人 當願衆生 得清淨命 不矯威儀

〔疏〕能離五邪。方爲正命。謂一詐現奇特。二自說功

德。三占相吉凶。四高聲現威。令他敬畏。五爲他說

法。行此五事。若爲利養。皆邪命也。第三句。通願離

五。第四句。但離初一

若見於王 當願衆生 得爲法王 恒轉正法

若見王子 當願衆生 從法化生 而爲佛子

若見長者 當願衆生 善能明斷 不行惡法

若見大臣 當願衆生 恒守正念 習行衆善

〔疏〕明斷。方稱長者。守王正法。始日大臣 二十四

願所遇人物竟

若見城郭 當願衆生 得堅固身 心無所屈

若見王都 當願衆生 功德共聚 心恒喜樂

見處林藪 當願衆生 應爲天人 之所歎仰

〔疏〕第七若見城郭下。二十二願。到城乞食時願。初

三總處。王都。則賢達輻輳。林藪。則衆德攸歸。

入里乞食 當願衆生 入深法界 心無障礙

到人門戶 當願衆生 入於一切 佛法之門

入其家已 當願衆生 得入佛乘 三世平等
〔疏〕次三入家未入。則諸家差別。入已。唯一無多。如
入佛乘。無二二三也

見不捨人 當願衆生 常不捨離 勝功德法

見能捨人 當願衆生 永得捨離 三惡道苦

若見空鉢 當願衆生 其心清淨 空無煩惱

若見滿鉢 當願衆生 具足成滿 一切善法

若得恭敬 當願衆生 恭敬修行 一切佛法

不得恭敬 當願衆生 不行一切 不善之法

見慙恥人 當願衆生 具慙恥行 藏護諸根

見無慙恥 當願衆生 捨離無慙 住大慈道

〔疏〕次八乞食得不藏護諸根者。瑜伽名善守根門。

淨名云。所見色與盲等。乃至云。知諸法如幻相是

也。〔鈔〕瑜伽名善守根門者。即第二十三論云。云何

念。乃至廣說。云何名為密護根門。謂防守正念。常

委正念。乃至防護意根。及正修行。意根律儀等。淨

名云。所見色等者。即迦葉章。令迦葉以空聚想入

於聚落。所見色與盲等。所聞聲與響等。所嗅香與

風等。所食味不分別。受諸觸。如智證。知諸法如幻

相。無自性。無他性。本自不然。今則無滅等。是故藏

護諸根。則不犯塵境。成六自在。王豈為六賊所劫奪耶。

若得美食 當願衆生 滿足其願 心無羨欲
得不美食 當願衆生 莫不獲得 諸三昧味

得柔軟食 當願衆生 大悲所熏 心意柔軟

得麤澀食 當願衆生 心無染著 絕世貪愛

若飯食時 當願衆生 禪悅為食 法喜充滿

若受味時 當願衆生 得佛上味 甘露滿足

飯食已訖 當願衆生 所作皆辦 具諸佛法

〔疏〕次七得食正食。

若說法時 當願衆生 得無盡辯 廣宣法要

〔疏〕後一食訖說法亦為報施主之恩也

從舍出時 當願衆生 深入佛智 永出三界

若入水時 當願衆生 入一切智 知三世等

洗浴身體 當願衆生 身心無垢 內外光潔

盛暑炎毒 當願衆生 捨離衆惱 一切皆盡

暑退涼初 當願衆生 證無上法 究竟清涼

〔疏〕第八從舍出下。還歸洗浴時節炎涼五願。可知

諷誦經時 當願衆生 順佛所說 總持不忘

若得見佛 當願衆生 得無礙眼 見一切佛

諦觀佛時 當願衆生 皆如普賢 端正嚴好

見佛塔時 當願衆生 尊重如塔 受天人供

敬心觀塔 當願衆生 諸天及人 所共瞻仰

頂禮於塔 當願衆生 一切天人 無能見頂

右繞於塔 當願眾生 所行無逆 成一切智

繞塔三匝 當願眾生 勤求佛道 心無懈怠

讚佛功德 當願眾生 衆德悉具 稱歎無盡

讚佛相好 當願眾生 成就佛身 證無相法

疏第九諷誦下。習誦旋禮時有十願。右者。順義。故

普耀經第二亦云。菩薩降神趣右脇者。所行無逆

故。佛功德者。謂如來十力等

若洗足時 當願眾生 具神足力 所行無礙

以時寢息 當願眾生 身得安隱 心無動亂

睡眠始寤 當願眾生 一切智覺 周顧十方

〔疏〕第十若洗足下。寤寐安息時三願。一切智覺者。非唯三世齊明。抑亦十方洞曉。一日始終既爾。餘時類然。

佛子。若諸菩薩如是用心。則獲一切勝妙功德。一切世間諸天魔梵沙門婆羅門乾闥婆阿脩羅等。及以一切聲聞緣覺。所不能動。

〔疏〕第三佛子。若諸菩薩下。結歎因所成益。若能如上。為善用心。若此用心。則內德齊圓。外不能動。心游大智。故人天不能動。心冠大悲。故二乘不能動。不動有二。一。修行時。此等不能惑亂故。二。不希彼

故

論已上以世間有此一百四十種事法。頓翻爲一百四十種大願。用成十信內修行之心。雖是有爲之心。能成十住已後五位之內。理智大悲之海。已後入位萬行之海。皆由此一百四十大願勝上緣力之所能成故。若初發心菩薩。無此之願。所修解脫。皆成聲聞獨覺之行。設是菩薩。但生淨土。無成佛緣。爲此教中發心菩薩。畢竟達此有爲。成其理智如也。

淨行品竟

大方廣佛華嚴經疏論纂要卷第二十六

芝城和義坊弟子黃秉鉉刻
華嚴經淨行品疏論纂要第二十六卷
上薦先考黃飛黃妣翁氏益娘伏願
同乘法力頓破幽關植金剛種資人天
福家庭廸吉嗣胤繁昌者
康熙壬戌冬
華藏室謹題